



Iohannes Nopel à Lipia apud Belgas honesto loco natus fuit. Is cum felici ingenio esset præditus, diligenter operam literis dedit, & in uirum doctissimum euasit. Itaq; Coloniensis Archiepiscopi in spiritualibus Vicarius, atq; Cyrenensis Episcopus declaratus fuit. Erat is singulari facundia & uitæ innocentia conspicuus. Vnde docendo & concionando apud Colonienses Catholicis plurimum profuit, atq; aduersarijs Euangelicis fortiter restitit. Cum hoc modo apud Belgas in magna auctoritate esset, florētibus adhuc annis, tertio nonas Iulij 1556 obiit, & Coloniae ob functionem præclarè administratam inter illustres dominos capitulares

summi templi, haud procul à capsa trium regū, honorificè sepultus fuit. Laur. Sur. in Naucleri appendice.